

01 APR 2001

Azmi-miskin

PUSAT BANTU GOLONGAN MISKIN DIBUKA DI BANDAR BESAR

KUALA LUMPUR, 1 April (Bernama) -- Usaha membanteras kemiskinan akan diperluaskan di bandar-bandar besar di seluruh negara dengan penubuhan "Pusat Rahmat" yang bertujuan membantu golongan miskin, kata Menteri Pembangunan Luar Bandar Datuk Azmi Khalid hari ini.

Beliau berkata projek perintis pusat itu mendapat sambutan menggalakkan sejak ia dibuka di Wisma PKNS di Jalan Raja Laut di sini Oktober 1999.

Tahun lepas, sebuah pusat seumpama itu dibuka di Melaka yang dikenali dengan nama Pusat Pembela.

"Kita akan ujudkan pusat ini di bandar-bandar besar di seluruh negara tahun ini...kita kena atasi masalah kemiskinan," katanya kepada Bernama di sini.

Semalam, Perdana Menteri Datuk Seri Dr Mahathir Mohamad berkata Barisan Nasional (BN) akan menumpukan lebih perhatian ke atas golongan miskin di bandar dan luar bandar melalui hubungan erat antara wakil-wakil rakyat BN dan masyarakat.

Azmi berkata kementerian akan melipatgandakan usaha membasmi kemiskinan di bandar dengan mendekati golongan sasaran seperti individu dan keluarga miskin.

Selain memberi khidmat nasihat kepada warga miskin dalam meningkatkan taraf hidup, Pusat Rahmat juga membantu warga kota mendapatkan pinjaman menerusi Amanah Ikhtiar Malaysia (AIM) bagi memulakan perniagaan kecil.

Katanya, kementerian juga akan meningkatkan usaha membasmi kemiskinan di luar bandar dengan menggalakkan penyertaan penduduk dalam kegiatan ekonomi.

-- BERNAMA

AZZ AZZ AKD